

12 OCT 1999

MAHATHIR-BSKL

SIMPAN SAHAM ANDA, KATA DR MAHATHIR

KLANG, 12 Okt (Bernama) -- Membeli saham dan menyimpannya akan membantu pemulihan ekonomi negara, kata Perdana Menteri Datuk Seri Dr Mahathir Mohamad, hari ini.

Syarikat-syarikat akan bebas daripada tindakan jualan margin apabila harga-harga saham di Bursa Saham Kuala Lumpur (BSKL) meningkat. Bank-bank juga akan menyaksikan penurunan pinjaman tidak berbayar, katanya.

Ini akan membantu mewujudkan persekitaran yang sesuai untuk pertumbuhan masyarakat perniagaan, katanya pada pembukaan perhimpunan agung tahunan ke-53 Gabungan Dewan Perniagaan dan Perindustrian Cina Malaysia (ACCCIM), di sini.

Dr Mahathir berkata menjual saham untuk keuntungan segera hanya akan menggugat peningkatan lanjut harga saham BSKL.

"Kalau naik dua mata dan jual sampai bila pun tak boleh naik," katanya. Indeks Komposit (CI) BSKL kini berlegar di sekitar 740 mata.

"Simpan saham anda. Percayalah, ia akan naik. Pada akhir tahun, ia akan naik kepada lebih 800 mata," katanya sambil berjenaka. Kenyataan beliau itu disambut dengan tepukan gemuruh para hadirin.

Perdana Menteri juga menggesa pelabur Malaysia membuat keputusan pelaburan sendiri tanpa terikut-ikut dengan petunjuk pelabur institusi asing.

"Apabila anda fikir ekonomi akan tumbuh, beli saham," katanya dan menambah bahawa akhirnya, pelabur akan meraih lebih banyak faedah daripada keuntungan modal yang lebih tinggi.

Dr Mahathir juga berkata pembekuan saham-saham Malaysia di Central Limit Order Book International (CLOB) di Singapura telah menyebabkan harga saham meningkat lebih tinggi berbanding paras harganya pada September 1998.

"Pada masa itu, saham-saham itu amat murah," katanya dan menegaskan bahawa harga saham sekarang adalah 150 peratus lebih tinggi.

Dr Mahathir berkata pemegang saham saham-saham Malaysia di CLOB harus berterima kasih jika mereka dibenar menjual saham mereka pada September tahun lepas, mereka hanya akan dapat satu perempat daripada nilainya sekarang.

-- BERNAMA

AD SHY JR